

1.1. Strateško fokusiranje

Na osnovu socio-ekonomske i SWOT analize postavljen je osnov za definiranje strateških pravaca razvoja Kantona, koji su fokusirani na sljedećih 5 oblasti:

1. Poticanje samoodrživog razvoja gospodarstva putem dugoročnog jačanja privrednih grana sa komparativnom prednošću u prirodnim i drugim resursima

Analiza trenda BDP-a po stanovniku u Kantonu 10 u odnosu na druge kantone u posljednjih pet godina pokazuje da je Kanton 10 u kontinuitetu drugi najsiromašniji kanton u FBiH, prema ovom parametru. Razvoj gospodarstva neophodno je poticati uz održivo korištenje bogatih prirodnih resursa (šume, vode, mineralne sirovine, poljoprivredno zemljište) Kantona 10. Također, u budućem razvoju gospodarstva treba iskoristiti vještine i tradiciju i izvozni potencijal u drvno-prerađivačkoj industriji, mljekarskoj industriji i ruralnom turizmu.

2. Razvijanje ljudskog potencijala Kantona 10 putem kontinuiranog obrazovanja, stručnog usavršavanja i prekvalifikacije u zanimanja potrebna na tržištu rada

U Kantonu 10 prisutna je strukturna nezaposlenost, kao posljedica neusklađenih programa obrazovnih institucija i potreba tržišta rada. Među nezaposlenima, visok je udio niskoobrazovane radne snage, a primijetna je i nedovoljna osposobljenost stručne radne snage za primjenu novih tehnologija u industriji. Uzimajući u obzir navedene probleme, jako je važno razvijati ljudski potencijal na način koji će osigurati održiv razvoj gospodarstva i obogatiti društveni život Kantona 10.

3. Zadržavanje mladih na području Kantona 10 poticanjem zapošljavanja i poboljšanjem sportskih i kulturnih sadržaja

Loša demografska slika Kantona 10 posljedica je negativnog migracijskog salda i negativnog prirodnog priraštaja. Činjenica je da mladi čine visok udio u ukupnom broju nezaposlenih osoba, pa je potraga za poslom najčešći razlog migracija mladih iz sela u gradove i iz Kantona 10 u druge kantone i druge države. U razvojnoj strategiji treba osmisliti i provoditi programe za zadržavanje stanovništva na području Kantona 10, a naročito aktivnosti za zadržavanje mladih, poticanje zapošljavanja i osmišljavanje pronatalitetne politike, i kreiranje kulturno-sportskih događaja u urbanim centrima Kantona.

4. Očuvanje okoliša i kreiranje pogodnih uvjeta za život stanovnika

Intenzivniji razvoj gospodarstva – nove investicije, intenziviranje poljoprivredne proizvodnje i ruralnog turizma – potrebno je raditi uz strogu primjenu propisa iz oblasti zaštite okoliša. Za praćenje stanja okoliša trenutno ne postoje sustavi za mjerenje razine zagađenja tla, zraka i vode, pa je potrebno raditi na uvođenju tih sustava. Očuvanje okoliša je složen proces u koji treba uključiti sve aktere – vlasti, stručnjake, poslovni sektor, investitore, nevladine organizacije i građane. Prilikom eksploatacije prirodnih resursa u Kantonu potrebno je poštivati principe održivog razvoja.

Potrebno je povećati ulaganja u prevenciju i sprečavanje šteta od prirodnih i drugih nesreća, i to korištenjem istih na način koji će omogućiti integraciju mjera prevencije i zaštite sa mjerama razvoja (korištenje lokaliteta u rekreativne i razvojne svrhe). Samo na taj način osiguraće se pogodni uvjeti za život stanovnika i poboljšati njihov životni standard.

5. Jačanje javne administracije u cilju stvaranja kvalitetne, ekonomične, pouzdane i transparentne javne uprave sa stručnom i profesionalnom službom na svim nivoima

Reforma javne administracije u Kantonu, kao i u cijeloj državi, je kontinuiran proces koji se provodi u skladu sa Strategijom reforme javne uprave u BiH. U razvojnom kontekstu posebno je značajno izgraditi kapacitete za kvalitetnu i transparentnu javnu upravu, koja će u narednom periodu moći sprovesti i dalje razvijati ne samo strategiju razvoja Kantona, nego raditi na razvoju sektorskih strategija, planiranju i realizaciji projektnih mjera, implementiranju programa i akcionih planova na efikasan, transparentan i participatoran način uključujući predstavnike ne samo javnog nego i privatnog sektora, nevladine organizacije, sportske i kulturne udruge.

Zakonodavni okvir¹ ukazuje na potrebu uvođenja novih modaliteta za upravljanje razvojem, a *Metodologija za planiranje razvoja kantona u Federaciji Bosne i Hercegovine* sadrži upute za razvoj i jačanje struktura za upravljanje razvojem.

1.2. Vizija razvoja

Vizija razvoja Kantona 10 odražava zajedničke interese različitih aktera u domenu gospodarskog, društvenog i okolišnog napretka, zasnovanog na principima održivog razvoja. Vizija je definirana na participatoran način i usaglašena sa članovima Partnerske grupe.

Vizija razvoja Kantona 10

Moderna zajednica temeljena na načelima održivog gospodarstva u kojoj žive poduzetni i zadovoljni ljudi, županija koja optimalno iskorištava svoje potencijale i pozitivno utječe na poslovno okruženje sa očuvanim okolišem i kulturnim naslijeđem koji ju čine privlačnom za investicije, život i turističku posjetu.

¹ Zakon o organizaciji organa uprave u Federaciji Bosne i Hercegovine ("Službene novine FBiH", broj 35/05); Uredba o načelima za utvrđivanje unutrašnje organizacije federalnih organa uprave i federalnih upravnih organizacija („Službene novine FbiH“, broj 36/06)